

Reifun á úrskurði nr. 8/2016 – Höfnun á leiðréttingu vegna tollafgreiðslu á bifreiðum

A kærði ákvörðun Tollstjóra um höfnun á leiðréttingu vegna tollafgreiðslu. Kærandi óskaði eftir því að aðflutningsskýrslur yrðu leiðréttar til lækkunar gjalda þar sem bifreiðunum hafði verið breytt eftir innflutning.

Niðurstaða: Heimild til leiðréttingar á aðflutningsskýrslu skv. 116. gr. tollalaga nr. 88/2005 á við þegar tollafgreiðsla hefur verið byggð á röngum eða ófullnægjandi upplýsingum. Ákvæðið á hins vegar ekki við í máli kæranda þar sem bifreiðarnar voru réttilega tollafgreiddar miðað við ástand þeirra við komu til landsins. Í 1. mgr. 9. gr. laga um vörugjöld af ökutækjum, eldsneyti o.fl. nr. 29/1993 er fjallað um breytingu á ökutæki sem verður til þess að það flokkast í hærri gjaldaflokk en við upphaflega skráningu. Í slíkum tilvikum ber skráðum eiganda að greiða viðbótarvörugjald ef breytingin er gerð innan fimm ára frá upphaflegum skráningardegi. Ekki er að finna sambærilega heimild til lækkunar vörugjalda eftir breytingu og telur Tollstjóri sér ekki heimilt að lögjafna frá fyrrnefndu ákvæði um hækkun gjalda á þann hátt að sama gildi um breytingu sem verður til þess að ökutæki falli í lægri gjaldflokk. Var ákvörðun Tollstjóra um höfnun leiðréttingar vegna tollafgreiðslu bifreiðanna staðfest.